



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百十三

咸豐十年庚申閏三月乙巳諭內閣勝保奏請將不遵軍令  
之都司革職提訊等語河南候補都司李永祿管帶馬勇隨  
同追賊行至新鄭縣地方經總兵承惠催令出隊該都司所  
帶馬勇輒敢藉端鼓譟折回鹿邑實屬膽玩已極李永祿著  
先行革職審訊如訊有故縱情弊即著按軍法從事其撤回  
勇丁著一併分別懲辦以肅戎行而伸法紀○諭軍機大臣  
等勝保等奏請調西安馬隊赴豫助勦等語前因捻蹤西竄  
經譚廷襄撥西安馬隊一千名防守函谷關茲勝保等奏請

借撥五百名。俟伊犁餘丁到豫。將此項馬隊撤回原營。惟勝保等前請調伊犁餘丁。並未准其調撥。此項西安馬隊。一經借調。即難遽行撤回。現在陝省防務緊要。已屬兵力不敷。分布勢難再行出調。况添兵即須添餉。河南欠解各省軍餉甚多。現又辦理民團。須籌經費。何得屢請徵調。不顧餉需。所奏著毋庸議。將此由六百里諭令知之。○以禮部右侍郎伊精阿。為繙譯會試正考官。工部左侍郎伊勒東阿。為副考官。○以呈進會試題名錄遲誤。知貢舉靈桂。楊式穀。下部議處。○以勦辦河南捻匪出力。賞守備張明崑。千總雷鳴夏。花翎五品軍功蕭成恆。藍翎餘升。擢有差。○准丁憂河南按察使周

士鏜。暫留勝保軍營差委。○丙午。諭軍機大臣等。前因翁同書。以餉需不至。兵勇飢潰堪虞。請於北路協餉外。另撥江西省銀數萬兩。當交戶部速查皖餉。分別嚴催具奏。茲據該部奏稱。江西月解曾國藩軍營餉銀六萬兩。徽防軍餉八萬兩。再令協濟皖北。力有未逮。應毋庸議。並據查明皖北軍餉。自九年正月為始。截至本年三月止。山西欠解銀五萬八千兩。陝西欠解銀二十三萬五千兩。河南欠解銀十二萬五千兩。請飭嚴催等語。山西等省。應解皖北協餉。積欠甚多。以致翁同書軍營兵勇。枵腹荷戈。軍情岌岌。設因糧絕潰散。大局何堪設想。著英桂。慶廉。譚廷襄。務將應解皖餉。按月如數解往。

其以前積欠。著限於半年內陸續解清。毋得仍前延宕。儻再任意稽遲。玩視軍需。致誤大局。惟該撫藩等是問。決不寬貸。將此由五百里各諭令知之。○命署廣西巡撫曹澍鍾。馳往四川。辦理軍務。○以廣西布政使劉長佑。為巡撫。按察使張凱嵩。為布政使。右江道華日新。為按察使。○丁未。諭內閣。內務府奏。請將有意徇隱之內管領議處一摺。內管領雙桂之子英連。係現審案內要犯。乃經刑部疊次片傳。並不交出。雙桂著交該衙門議處。仍責令將伊子英連交出。歸案審訊。並著步軍統領衙門。內務府。順天府。五城。將英連一體嚴拏。務獲。毋令遠颺。○又諭曹澍鍾奏。紳團互殺。請將擅決之知縣。

把持包庇之紳士。革職審辦一摺。廣西署平南縣知縣羅綱。因團總劉彥文等。平日藉團恣暴。並有砍死鄰團廩生謝林之事。遂將劉彥文。黃榜元。誘殺。已屬擅決。並據劉彥文等家屬呈訴。有受賄謀殺等情。省局紳士郎中唐岳。親復該團信。函。輒即代為包攬。謁見巡撫兩司。囑其查辦。代寄總督信。函。且令其叩關。懇憑寄信御史。其為包庇。已屬顯然。而該縣復訐其受賄庇匪。情節尤重。案關官紳互訐。受賄枉殺。虛實均應徹底根究。署平南縣知縣羅綱。鴻臚寺卿銜候選郎中唐岳。均著革職。交張凱嵩。提同全案人證卷宗。認真研訊。確情定擬具奏。並著劉長佑。一體稽查。務期水落石出。毋得草率。

續纂錄卷三十三  
三  
結案。○諭軍機大臣等。本日何桂清等奏。溧水失守。通籌防  
勦情形一摺。據稱。三月二十八日。溧水失守。大股逆匪。與金  
壇之賊。併竄紅山地方。距白塊僅十餘里。請將常鎮諸軍。就  
近暫歸張玉良節制等語。白塊地方。上通句容。下達丹陽。並  
可直抵鎮江。設該逆分竄。則大營後路為賊所包。於大局甚  
有關繫。句容雖經和春派兵防堵。而丹陽鎮江。空虛實甚。何  
桂清現派副將向奎。馬占葵等。統帶兵勇。先赴鎮江。並飛催  
熊天喜。率廣德得勝之師。由常赴鎮。一俟趕到。再令馬占葵  
一軍。扼守瓜州。以通大營至蘇常之水路。派已革總兵蕭知  
音等。帶領兵勇。並舢板船隻。馳往丹陽一路。以通大營至蘇

常之陸路。布置尚屬周妥。惟溧陽尚未克復。金壇之匪。有回  
竄之信。宜興西北各鄉。賊氛尚熾。當此逆匪環逼。何桂清所  
派各軍。是否足敷防勦。著和春。張國樑。體察情形。趕緊將大  
營後路。妥為布置。毋令該逆分竄丹陽鎮江等處。逆匪欲由  
豐義直撲常州。該處防務。未可稍涉大意。所有總兵馬得昭  
等兵勇。自應一併暫留常州調遣。張玉良已到常州。著暫留  
江蘇。節制諸軍。一切防勦機宜。仍隨時咨商和春。張國樑。務  
令聲勢聯絡。不可顧此失彼。將此由六百里諭知和春。張國  
樑。何桂清。並傳諭張玉良知之。○以署正藍旗蒙古副都統  
奕貴。為正紅旗蒙古副都統。○以甘肅肅州鎮總兵官張玉

良。為廣西提督。未到任前。以廣東陽江鎮總兵官潘慶。署理。  
○以自陳病廢。革副都統伊興額職。勒令回旗。○予廣西軍  
營病故提督慶寅。祭葬卹廕。○戊申。諭軍機大臣等。前因捻  
匪窺伺陝境。恐其旁竄晉疆。當諭將前備調官兵二千名。飭  
原揀統帶之副將穆騰額等。帶赴澤潞一帶。擇要扼劄。旋據  
英桂奏。已於太原大同二鎮。挑選官兵。並於省標派兵。分防  
要隘。以杜竄越。本日據僧格林沁等奏。請調山西備調官兵  
赴防等語。山西毗連陝州等處。既據該撫派兵嚴防。並另挑  
太原大同兵二千名。赴省聽候。是分布之兵。尚可敷用。所有  
前諭備調官兵二千名。著英桂即飭穆騰額等統帶。配帶擡

槍烏槍。馳赴津郡。聽候僧格林沁調遣。毋稍遲誤。將此由五  
百里諭令知之。○又諭。前因楚省各軍。分道入皖。攻勦喫緊  
之時。以得力勁軍。分撥赴浙。恐兵力空虛。當諭令蕭翰慶。所  
帶之衡勇義勇。仍留楚省。為入皖勦賊之用。茲據張芾奏。浙  
西敗匪。竄至建平一帶。甯國府情形危急。並浙東又有賊氛。  
徽州防務增嚴。請暫留援浙楚師等語。江西股匪。由鉛山等  
縣。擾及浙江邊界。與徽屬歙休婺源毗連。並窺伺歙南之連  
嶺歙嶺。現在甯國緊急。徽防又以浙東有警。多所牽掣。淳安  
竄賊。飄忽靡常。自應亟籌埽蕩。勿致蔓延。所有蕭翰慶一軍。  
著准其留於張芾軍營。即飭令進攻旌太涇縣。速解甯國之

圍。以保全皖南大局。另片奏。請飭曾國藩督辦皖南軍務等語。曾國藩現在安慶。勒辦賊匪。皖北情形喫重。其所部得力將弁。調撥至他省辦理防勦事務者。亦已不少。若將曾國藩調往皖南。恐所統各軍。無人接管。所有皖南軍務。仍著責成張芾。督同周天受。認真辦理。相機籌畫。以期事權歸一。迅掃賊氛。毋庸輕議更張。至各營積習。務須力為整頓。不得因難推諉。日就廢弛。將此由六百里諭令知之。○欽差大臣僧格林沁奏。津防軍報緊急。探差官弁口分。並駝馬餵養。每月需銀一百三十六兩零。請全准支領。從之。○以內閣學士依奇哩。署正藍旗蒙古副都統。○以甘肅安西協副將李世忠。為

肅州鎮總兵官。○己酉。諭內閣。刑部奏。現審案內。供有職官句引外人。強劫已家財物。請旨革職嚴審一摺。此案內。務府正白旗漢軍候選同知德溇。呈報被賊持械撞門。劫去財物。業據該員家人王四等供稱。德溇曾密告以數日內。邀人強搶伊母財物。並據德溇之母薛氏供稱。德溇向不務正。被劫後。在德溇房內。搜出金銀等語。提訊德溇。則稱並非被劫原贓。其句引外人。強劫伊母財物之處。堅不承認。顯係恃符捏飾。希圖避就。德溇著即革職。嚴行審訊。並著步軍統領衙門。順天府。五城。將此案贓賊。嚴拏務獲究辦。○諭軍機大臣等。本日據瑞昌奏。賊蹤移竄嚴屬。杭省又形危急。請飭撫鎮回

援。並逆匪由分水竄踞昌化縣城。各摺片。逆匪大股。由開化之華埠竄出。於三月三十日。竄入遂安。又分股撲擾淳安。竄踞昌化縣城。大肆焚掠。該縣水陸交通。逼近杭郡。自應亟籌防勦。現在王有齡已啟程赴浙。省城一切守禦事宜。自可與該將軍周密布置。惟杭州甫經收復。人心未定。存城兵勇。不過五千。實形單弱。復無得力大員統帶。甚屬可虞。張玉良因蘇常告警。業已馳赴常州。現在該處情形稍鬆。自應先其所急。著和春等。即飭張玉良。統帶兵勇。迅速折回杭州救援。竭力堵禦。毋令賊蹤再行闖入。復肆蹂躪。以保省垣重地。前諭和春。調鄭魁士由溧水赴常州督兵。較為近捷。儻鄭魁士或

因老病。未能獨當一面。著和春體察情形。另派得力大員。前往節制諸軍。妥為勦辦。何桂清身任總督。一切防勦機宜。亦可就近調度。務須督飭諸軍。趕緊將溧水。建平。東壩。等處克復。毋令窺伺腹地。致滋蔓延。以保全東南大局。將此由六百里加緊諭知和春。張國樑。何桂清。並傳諭張玉良知之。○又諭。瑞昌奏。逆匪由開化進竄遂安。又分擾淳安。嚴州防務喫緊。旋復竄踞昌化。杭城又形危急。本日已寄諭和春等。並傳諭張玉良。迅速回援。王有齡於本月初五日起身。計已馳抵省垣。著即與瑞昌妥籌布置。固結人心。示以鎮定。一面嚴密防守。一面遴派得力將弁。在城外劄營。扼要截擊。不得如羅

遵殿株守省城。致蹈覆轍。瑞昌現調李定太節制各軍。該員前次赴援杭州。遷延不進。並聞所帶兵勇。到處騷擾。似此庸懦之員。恐難勝統率之任。現在衢防較鬆。張玉良未到以前。即可令饒廷選。暫行節制各軍。仍嚴飭李定太。約束兵勇。奮力勦賊。儻再觀望不前。即行從嚴叅辦。並飭布興有管帶礮船。嚴防江路。毋許疏懈。省中鄉勇。僅止五千。朕聞兵勇多有通賊之事。此次瑞昌所奏。即有土匪潰勇。為賊先導等語。必須查明各勇。如有通賊情事。即正法數人。以儆其餘。該將軍等奏稱。遂安被賊竄入。城池是否失陷。及昌化失守情形。文武各官下落。著瑞昌。王有齡。迅即查明。據實具奏。將此由六

百里加緊諭令知之。○子貴州黃平州陣亡知州楊承照。祭葬世職。並於死事地方建立專祠。妻王氏。子恆錫等十一名。口。分別旌卹。一併附祀。○庚戌軍機大臣。會同內務府大臣。審訊太監張府。私藏軍器。並知情不舉各犯。分別定擬。得旨。張府著即處絞。○以江南句容縣城被賊竄陷。革副將梁克勳職。予陣亡把總王德魁。王得均。祭葬世職。○辛亥。諭內閣。吏部具題。遵議禮部漏檢科場條例之堂司各官處分。此係嚴辦科場案內之事。禮部初次奏摺。實屬含混。迨經特派會同覈議。始行更正。試問科場既有專條。何得謂之漏查。及自請議處。又何得謂之檢舉。將該堂司照徇庇例治罪。亦不為

過。况此係去歲秋間之事。因何遲至半年之後始行具題。著吏部堂官明白回奏。至麟魁等處分。著吏部照有意蒙混。尚非始終徇隱例。酌擬具奏。尋奏。遵擬禮部郎中壽昌等。應照徇隱例減等。降一級調用。尚書麟魁等。降一級留任。均不准抵銷。從之。○又諭。前據刑部審擬。驍騎校阿克達春。呈控佐領奎福。不准眾軍卸米一案。當經派令載垣。會同本旗都統惠親王等。再行秉公覆覈。茲據載垣等。查明定擬具奏。並據德全等。以失察屬員辦理軍米舞弊等情。自請議處。此案。候補印務章京玉崑。於鑲黃旗軍米出倉。包攬售賣。減價散放。參領吉瑞等。因辦公款項。均由辦米餘錢內墊發。因循容隱。

咸豐九年分春季軍米。除減價散放。及墊給合旗公用外。餘錢至四千餘吊之多。均經玉崑與吉瑞等分用。驍騎校阿克達春。訪知情弊。呈控。經惠親王。派委吉瑞等訊問。吉瑞等會同署佐領奎福。向阿克達春。玉崑。開導。並經奎福。將該驍騎校應得甲米付給。令各具和息親供。隨經惠親王。訊知阿克達春所具親供。非出本意。奏交刑部審辦。該部並未深究。屢向阿克達春威嚇。將就擬結。迨經載垣等。傳集原被人證。逐層研訊。始各供認前情不諱。已革參領吉瑞等。於該旗應領軍米。任聽玉崑違例私折。復敢收用贓錢。苦累眾軍。實屬罪無可逭。已革參領吉瑞。松瑞。奎福。均著從重發往新疆。效力。

贖罪。印務章京瑞柏。常順。驍騎校慶舒。玉和。文明。德克津布。國紳。均著革職。與已革參領瑞禧。祥慶。均從重發往軍臺。效力贖罪。吉瑞等均無庸追贖。即行起解。領催松林。得受津貼錢文。計贓較輕。著革去領催。無庸治罪。頭等護衛毓祥。趕福。二等護衛志格。四品典儀恆順。六品包衣達存興。於應得俸票。並不關領。輒行售賣。實屬有干功令。均著即行革職。領催廣義。為玉崑請託未成。畏罪逃走。雖旋經投案。殊屬狡猾不法。著革去領催。銷除本身旗檔。仍笞五十。解任驍騎校阿克達春。屢控屢銷。無非假公濟私。意存挾制。著即革職。候補印務章京玉崑。私辦軍米。婪贓行賄。業已畏罪自縊。所得贓錢。

並無確數。著免其追繳。伊子馬甲惠昌。著革去馬甲。永遠不准批補差使。已革司儀長玉連。通同玉崑舞弊分贓。眾供確鑿。未便因其堅不承認。稍滋寬縱。著從重發往新疆。效力贖罪。並無庸追贖。即行起解。該犯等犯事。均在恩詔以前。惟情節較重。均不准其減免。副參領文桂。印務章京兼公中佐領瑞慶。於承審阿克達春控案。任聽原被告捏供和息。刑部堂司各官。審理此案。亦未深究。將就擬結。均有不合。著一併交部議處。鑲黃旗滿洲都統惠親王。失察所管旗員舞弊得贓。及本府護衛交接旗員。私賣米票。著交宗人府分別議處。副都統德全。載堪。失察屬員辦米舞弊得贓。德全並失察家人。

收受喜錢。均有應得之咎。著交部分別議處。○又諭。恩麟奏查明織關兩處情形一摺。本年二月間。賊陷杭城。織造衙署案卷等件。盡遭殘損。南北兩關口址。半被蹂躪。其庫存銀兩。亦被劫掠。恩麟未能先事防範。又未自請議處。實屬昏愎。所有被劫之飯食等銀八千餘兩。著恩麟照數賠補。其衙署及兩關口址。亦著一律賠修。仍交部議處。以示懲儆。○諭軍機大臣等。前因曾望顏奏。撤任知府翁祖烈。臚列八款。訐告。並鈔錄呈覽。當經諭令崇實。於行抵四川後。秉公查辦。茲據崇實奏。行抵川省日期。先將現在軍務。咨詢該署督。並翁祖烈原訐八款。與曾望顏錄呈之件。語句不符。鈔錄覆文。訐款各

件呈覽。所有督勦畏葸。及武備廢弛二款。雖經該署督據咨答覆。仍著該大臣。與原訐各條。一併詳細查明。秉公覈辦。務期水落石出。毋得稍有不實不盡。至原稟八款。既與曾望顏錄呈之件不符。著即照該撤任知府原稟查辦。其曾望顏應得處分。俟該大臣逐款查明奏結時。再降諭旨。將此由五百里諭令知之。○又諭。前因扎拉芬等奏。請飭催甘省欠餉。當經諭知林揚祖。無論何款。先行籌撥銀數十萬兩。解赴伊犁。復據林揚祖奏稱。甘肅藩庫存款無多。請飭各省迅速續解。並稱陝省自再設捐局以來。書捐銀數已八十餘萬兩。請借撥銀十五萬兩。解甘等語。當交戶部速議具奏。茲據該部

奏稱各省協濟甘餉積欠已至一千數百萬兩。上年十一月內曾由該部查明。令先籌撥銀各數十萬兩。於年內解赴甘省。請嚴飭各省仍遵該部前奉諭旨籌解等語。山東河南山西陝西各省應解甘肅協餉。自上年正月。起至本年二月止。僅據解到七十餘萬兩。其餘積欠未解者甚多。邊疆重地待餉孔殷。似此任意延玩。必至貽誤要需。著文煜英桂慶廉譚廷襄仍遵上年該部奏奉諭旨。籌撥銀各數十萬兩外。迅將積欠餉銀。按照該部指撥各數。速行解赴甘省。毋得仍前稽延。致滋貽誤。其河東應解甘省餉銀。據林揚祖奏稱。已報解五萬兩。該部復查明。本月初三日。河東又報起解銀五萬兩。

合計已及十萬兩。著林揚祖仍遵前旨。督飭各該藩司。無論何款。先行提借。合之河東解到甘省銀十萬兩。共籌撥銀數十萬兩。先行解赴伊犁。以免延誤。至陝省應撥安徽軍餉一百五十餘萬兩。曾於咸豐八年間。經安徽巡撫奏請。以兩淮欠解甘餉抵撥。是此項抵款。陝省即應迅速籌解。何以遲延至今。報解甚少。且陝省書捐銀數。已有八十餘萬兩。現在該省雨水應時。開徵又早。藩庫存款。自應充裕。著譚廷襄即於捐輸釐金各款。先行借撥銀十五萬兩。作為抵撥應解之款。限於四月十五日以前。解赴甘省。毋許藉詞延宕。致干咎戾。將此由五百里各諭令知之。○又諭海瑛奏。署提督田興恕。

現督大隊由靖州拔營。取道黔省之銅仁一帶。分路進兵。以固貴陽省垣門戶。兼防粵匪。惟所部兵練僅四千餘名。不敷防勦。擬添募壯丁。足二萬人之數。始能濟事。月需餉銀十二萬兩。黔省斷難籌茲鉅款。請飭湖南。並江西。湖北等省。按月各協濟數萬兩。由湖南湊足十二萬兩。以濟田興恕軍餉等語。黔省餉需支絀異常。前因該署提督一軍入黔。餉需不繼。恐致停兵待餉。諭令駱秉章設法籌撥。現在該省苗教各匪竄越過江。逼近省城。情形危急。田興恕所部兵練僅止四千餘名。自應添募壯丁。以資攻勦。所需月餉。黔省無從籌畫。均係實在情形。非各省力籌協撥。田興恕亦必束手無策。惟江

西防兵。尚有四萬餘名。又月解曾國藩及徽甯軍餉。為數已屬不支。仍恐有名無實。若令楚南北月籌十二萬兩之數。湖北現在分兵入皖。湖南亦派兵援川。援粵。餉需未能充裕。恐難籌此鉅款。著官文。胡林翼。駱秉章酌量情形。不必限定數目。按月設法籌撥。由湖南轉解。總期田興恕新舊各部。士飽馬騰。不致因餉缺掣肘。是為至要。將此由六百里各諭令知之。○署貴州巡撫海瑛奏。黔省己未恩科鄉試。因軍務喫緊。未能補行。仍請展緩。從之。○以安徽紳團協力收復城池。永廣懷遠。五河。兩縣。及臨淮鄉。文武學額各二名。鳳陽縣三名。○予廣西陣亡知州積綸。吏目李作東。把總徐嘉會。祭葬。世

職軍功郭永清賞卹如例。○予浙江杭州殉難刑部員外郎許潤身妻孫氏等十口。旌卹如例。○豁免安徽懷遠鳳陽五河三縣及臨淮鄉被擾地方積欠額賦。○壬子諭軍機大臣等。本日據何桂清奏。夷酋復各呈遞照會。意在以兵脅和。一摺。該酋等攔漕停稅之舉。雖經華商與洋商多方阻止。始行罷議。而兵齊報復之說。仍復牢不可破。所遞照會。無非欲以兵脅和。言辭殊為狂悖。現在啖酋已換。喇唵。啡酋已換。噶囉。均有四月可到之說。既已換人。此時噶酋等諒未必遽敢犯順。該大臣惟當俟喇唵等到後。仍飭薛煥督同吳煦。密飭華夷各商。迎機開導。俾就範圍。此時無庸再與噶酋噶辯。轉

令彼持之愈堅。至天津原定條約內。為害最甚者。如夷船入江。海運河運。皆歸其掌握。挾制無窮。夷人駐京。則中國為外夷所監守。自古無此體制。萬不可行。其餘各條。如無大窒礙之事。即不妨略予通融。如果該夷一意堅執。不肯改易。輒云奉有伊國勅諭。該大臣亦可云。此事係屬奉旨斥駁。藉以折服其言。至所稱薛煥應否豫飭來京。此言殊屬非是。天津非議和之地。溯查道光年間。各國更換條約。均在外間議定。章程。送至京師用寶。今既許其來京。礙難與噶酋再說更改。必當事事說妥。然後許其進京。彼時薛煥前來。亦不過令其作一見證。並非在津議事也。該大臣仍當飭薛煥迅赴上海。設

法挽救。豈可先令北來。竟以議和一事。諉之天津耶。至噶爾  
哈到滬。當以噶首背約一事責之。並非中國失信。此時仍准  
議和。係中國格外寬恕。所有在上海換約一事。不妨與噶爾  
哈說知。看其有無轉機。再行酌辦。至該大臣此次已許噶首  
等代奏。該夷必要索看上諭。為此另寄諭旨一道。以便該大  
臣於奉到時。或摘錄給予閱看。或傳述大意。令彼知悉。此密  
寄中言語。萬勿先行宣露為要。將此由六百里密諭何桂清。  
並傳諭薛煥知之。○又諭。何桂清奏。噶爾二國公使投遞照  
會。據情代奏一摺。噶爾二國。自道光年間。五口通商以來。十  
餘年間。久歸和好。從無稱兵構釁之事。乃中外所共知者。迨

咸豐七年。無故於廣東起釁。八年復直犯天津。經桂良等推  
誠開導。許立條約。詎上年春間。又帶兵船到津。不遵理諭。毀  
我海口防具。首先背約。其損兵折將。實屬咎由自取。並非中  
國失信。所有八年議和條款。自應概作罷論。惟據何桂清奏。  
中國與外國各商。恐礙生計。不願再啟兵端。噶爾亦當深  
知悔悟。乃此次照會內。仍欲事事須從原約。是噶爾尚未  
自知悔悟。該督亦無從代彼乞恩。如其真心和好。朕亦必體  
恤中外各商。允其所請。然必於前議條款內。擇道光年間曾  
有之事。無礙大體者。通融辦理。令其有以回報該國。保全顏  
面。仍須於上海定議。不得率行北來。儻再有兵船駛入攔江

沙。毀防守器具等事。必當痛加攻勦。毋貽後悔。至噤使照會  
內。有以軍機大臣不自行覆給照會。為簡慢之處。不知道光  
三十年。暎國投文與軍機大臣穆彰阿等。其時即由兩江總  
督陸建瀛代為答覆。因軍機原不管通商之事。此時照舊例  
辦理。並非簡慢。將此由六百里諭令知之。○禮部以繙譯會  
試中額請得旨。京旗取中一名。駐防取中一名。○癸丑。諭內  
閣。稽查北新倉御史恩霽奏。拏獲偷竊倉糧賊犯一摺。本月  
十五日夜間。北新倉有賊犯多人偷竊倉糧。經該倉監督榮  
魁。會同朝陽汛把總周麟。楊廣福等。拏獲賊犯及窩賊人犯  
共五名。並賊米五石零。所有賊犯張大。安。四。魯。太。窩賊人犯

張有兒。王大。連接獲賊米。著一併交刑部嚴行審訊。其未獲  
賊犯孔禿子等二十三名。及買賊之天義米局。洪興米局。著  
步軍統領衙門。順天府。五城。一體嚴拏務獲。歸案究辦。其歲  
字廠被竊米石確數。著派劉崐。會同倉場侍郎廉兆綸。盤查  
具奏。○諭軍機大臣等。據楊載福奏。巡查下游江面。派營堵  
勒情形一摺。逆匪於李陽河盤踞附近山後。騷擾村市。並擄  
船欲渡北岸。該提督行至池州府之鳳凰峽。內港水淺。礙船  
不能前進。土橋逆匪。築壘開濠。水師獨攻一面。難以得手。現  
在李陽河。既經楊載福。派總兵李成謀等。移營扼堵。即著飭  
令嚴密防守。毋令賊匪得以偷渡。其鳳凰峽等處。既未能進

攻著楊載福督飭各營堵剿。於沿江各要隘。不時帶船梭巡。與陸路楚軍互相聯絡。俟胡林翼等克復桐舒。移師會剿。以期一鼓蕩平。樅陽等處。復有該匪偷載蘆柴。欲運往安慶。業經為我兵焚燒。仍飭李成謀等。加意防範。毋稍鬆懈。江南現因溧水。句容。相繼失守。溧陽又未克復。得力兵勇。調赴常州。鎮江等處。大營頗覺空虛。恐金陵殘喘餘孽。乘虛外竄。則蕪湖。安慶。益形喫重。著楊載福。會同江南水師總兵吳全美。李德麟等。聯絡聲勢。隨機痛剿。力杜外竄。是為至要。將此由五百里諭令知之。○命河南學政李鴻藻。來京供職。以右春坊右中允景其濬。提督河南學政。○甲寅。諭內閣。戶部奏。請將

抵通漕米。收存城內七倉。以杜偷漏等語。城外倉廩。巡查看守。未能嚴密。疊經該部奏准。先儘城內七倉收儲。乃數年以來。仍未遵辦。所有本年江浙海運。豫東河運漕糧。除清河安河之本裕豐益二倉。仍按應放之數派收外。其餘米石。著倉場侍郎。儘數均勻。派收城內七倉。不得意為多寡。以重倉儲。○又諭。前因袁甲三奏。副都統伊興額。自陳病廢。降旨革職。飭令回旗。茲據都察院奏。安徽監生張鴻文等。於未奉諭旨之前。聯名赴該衙門具呈。懇令該革員仍駐濉溪。總辦勦匪事務等語。伊興額前在軍營。屢次獲咎。朕因江蘇民人鄭立本等。來京具呈懇留。是以俯順輿情。令其仍駐濉溪。認真勦

捕乃該革員藉稱患病延不前往嗣復派赴袁甲三軍營帶  
隊勦賊輒敢自陳病廢不能當帶兵重任是伊興額辜負朕  
恩並非朕棄置不用所有該監生等聯名具呈之處著毋庸  
議張鴻文即交該部遞解回籍○諭軍機大臣等前因扎拉  
芬奏奏接據裕瑞函稱浩罕因葉爾羌弁兵毆斃額爾沁有  
帶兵前來滋擾情形當經諭令扎拉芬泰等密飭各城嚴行  
防範以期有備無患本日據扎拉芬泰等奏委員查稟及現  
擬籌辦大概情形並將夷字各件鈔錄呈覽此次浩罕派來  
夷使愛孜木巴巴已到喀什遞字庫孜伯克尚未進卡所遞  
字內詭稱毆斃額爾沁一事尚未告知浩罕伯克以額爾沁

口回之事先行探聽情詞詭譎其大旨總在籠絡愚回懈我  
邊防然後入卡句結羣起響應惟現在既遣使遞字即尚有  
可乘之機該將軍等當熟籌駕馭挽回之法勿使事機即形  
決裂方為妥善著仍遵前旨一面密飭各城不動聲色嚴行  
防範以期有備無患法福禮前已有旨令馳往烏魯木齊署  
理都統茲據奏稱該參贊大臣熟悉該處情形如浩罕稱兵  
須令前往統師等語著扎拉芬泰等酌量情形如果烏魯木  
齊相距較遠於策應實有未便即著法福禮留於伊犁暫緩  
啟程前往將此諭令知之○又諭前因扎拉芬泰等奏據裕  
瑞函稱探聞浩罕有派兵前往冰嶺等事當經諭令裕瑞等

妥為防範。本日復據扎拉芬泰等奏。查明額爾沁被殲情形。並因接到裕瑞信函。知浩罕明巴什。續派夷使愛孜木巴巴。庫孜伯克。兩人前來。即將明巴什圖書字二件。鈔錄呈覽等語。額爾沁於入城筵宴後。本已退去。因聞礮驚駭。互毆致斃。該大臣等。實屬未能先事審慎。覽明巴什信內。有自古至今。並未聽見過此事。因恐伯克生氣。再來騷擾地方。未曾回知之語。意在籠絡愚回。俾知其曲在官。而不在彼。且欲解我邊防。一旦入卡。必至羣起響應。不可收拾。殊屬居心叵測。裕瑞等久無奏報。此次該夷使等既來探信。亟應設法曉諭。將額爾沁築營滋事之處。詳細告知。使自知理屈。以免遽開邊釁。

其各城回眾。仍須加意安撫。萬勿任令該夷煽惑。致被勾結為患。一切仍與扎拉芬泰會商。妥為籌辦。不得再涉疏忽。致干重咎。並將近日辦理情形。詳細馳奏。將此諭令知之。○署貴州提督田興恕奏。帶兵先援省城。再圖分勦。得旨。黔省餉項匱竭。汝須認真撫循。威令必行。勿使潰散驕惰。○以內閣學士清安。署正紅旗漢軍副都統。○以湖北按察使嚴樹森。為布政使。督糧道唐訓方。為按察使。實授恩錫。安徽按察使。○予四川名山等處陣亡千總陳洪猷。把總田長林。外委張昇。趙生祿。祭葬世職。

實錄卷三百十三

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百十三

